

Poldi Tesalonaikahidok pepa timen youyemguk

Yodakale Mede

Pepa yon adi Poldi Tesalonaikahi kayonbopdok mede timen youyemguk. Tesalonaika adi Masedoniya kwet diniŋ yokwet wapum niŋ. Ala Pol adi Filipai kwetneŋ hatiguk u biŋa buŋa Mede Momooŋ yohauta kwanai uŋoŋbo tububihila tuguk. Tubune metam feedi wele tubutakale tiŋa Kilisto'walaŋ gawaŋbop mintaune Judahidi nadiune tuwot mu tubune kwanaiŋiŋdok mik timiŋgiŋ. Unduŋ tubune Pol adi Tesalonaika kwet bikabuŋa Beleade wooŋ dapmaŋ Kolinde uguk. Uŋoŋ wooŋ hatilune mindaŋkade Timotidi wooŋ gawaŋbop Tesalonaika uŋoŋ dediŋ hatigiŋ diniŋ kahat timiŋguk. Kaŋ Poldi kahat u nadiŋa Tesalonaikahi gawaŋbop hatigiŋdok yeniŋkiliti mede timen timen iŋakoŋ youyemguk. Tiŋa undugoŋ yeniutumba mede maŋ youyemguk, tiŋa undugoŋ adi'walaŋ Jesu bubuŋiŋ diniŋ nai eŋ kougoŋ hatigene kumuŋa pilali kunumkwet kahilekahile diniŋ yonadibedi hayemguk wendok maŋ youla yenindakaleguk.

Youtumba Mede

1 ¹ Pol, Sailas tiŋa Timoti indi Baŋ Bepaŋ eŋ Wapum Jesu Kilisto'walaŋ metam Tesalonaika yokwet diniŋ kayonbop hatiŋiŋ, hiditok pepa i youhamam.

Bepaŋ'walaŋ siloŋ tobogoŋ eŋ kulemadi hidigut haliwooŋ halaak.

²Indi helemaheman hidi nadisuhamuŋa Bepaŋ niutumbayam. Tiŋa undugoŋ Bepaŋ ninadiyamneŋ u hiditok maŋ ninadiyam. ³Hidi nadisukilitihik diniŋ folooŋ miŋgilangoŋ tubumintaŋ woŋ adi welehiŋdi me noli yabukahilekahile u fafaŋe tiŋa tiŋiŋ eŋ Wapumnik Jesu Kilistodok nadikunakunale tiŋila malabumuŋ gineŋ fafaŋeŋgoŋ hinek gigne tiŋa yaŋiŋ, wendoktiŋa Betnik Bepaŋ namanda foloŋ wendok nadisuŋa tomboyoutnit yobihila niyam.

Bepaŋ'walaŋ Mede Momooŋ Tesalonaikahi yenihautagiŋ

⁴Notniye, Bepaŋ adi welenŋi hinek habukahileŋeŋ agaŋ netok gigit hehitubu-dakaleguk uyadi indi agaŋ nadiyam. ⁵Unduŋ doktiŋa

Jesu'walaŋ Mede Momooŋ u hidi'walaŋkade tiŋa bugumun, kaŋ kaune mede fiit nabugoŋ mu tuguk. Mokoŋ. Adi saŋiniŋnit eŋ Uŋgoŋiŋ Munabulinit mintaguk, kaŋ hidi indi'walaŋ nadisukilitinik saŋiniŋnit u agaŋ kadakale hinek tigiŋ. Doktiŋa indi hidi'walaŋ lekiŋgoŋhik gineŋ hatiŋila hidi hehitubu-lodadok yoŋa titiŋ tugumun u hide-ku agaŋ nadiiŋ.

Mede Momooŋ u folooŋnit tuguk

⁶Hidi Bepaŋ'walaŋ mede nadidahi tigiŋ, kaŋ malabumuŋ fee hinek mintahamguk, iŋgoŋ hidi yadi indi'walaŋ eŋ Wapum'walaŋ titiŋ takaligiŋ. Kaŋ Uŋgoŋiŋ Munabulidi welehik tubulodaune nadifo tubumintagiŋ. ⁷Unduŋ tiŋa Masedoniya tiŋa Akaia kwet wapumneŋ metam hogohogok Jesu nadisukilitimiŋiŋ heki titiŋ momooŋ u yeniyehitubu-didimegiŋ. ⁸Wapum'walaŋ mede adi hidi'walaŋkade mintahautaaŋ wooŋ Masedoniya tiŋa Akaia kwet wapumneŋ mintaguk. Tiŋa u hogok moŋ. Hidi Bepaŋ nadisukilitimiŋgiŋ diniŋ gigit u yokwet indigoŋ tuwot nadidapmagiŋ, kaŋ indi yeniyeniŋdok talik nemu mintaguk. ⁹Indi hidi'walaŋkade bugumun kaŋ nai uŋaniŋ maŋgoŋ mintaguk wondiniŋ kahat adi nehi agaŋ niniŋ. Tiŋa hidi bepaŋ yalayalaŋ sigilulum tiyemiŋa welehik tubutakaleeŋ Bepaŋ biyagoŋ hatihatiniŋ'walaŋkade wooŋ kadiŋa adi'walaŋ tipilapilaye-metam mintagiŋ, ¹⁰tiŋa mihiŋiŋ Jesu kumuŋ gineniŋ tubupilakuk, adi hatigene kunum gineniŋ fooŋ kadakaninŋdok kibikoŋ wobuwobu nai foloŋ nihitubu-lodaune Bepaŋ kwihitaŋiŋdi mu nihitubu-kadakawaak. Hidi aditok woom hatiŋiŋ, wendiniŋ kahathik adi yokwet indigoŋ tuwot yoŋiŋ.

Pol adi Bepaŋ ne hogokdi kwanaiŋiŋ kaune utumbadok yoguk

2 ¹Notniye, indi hidi'walaŋ lekiŋgoŋhik gineŋ buŋa kwanai tugumun kaŋ folooŋ mokit mu mintaguk, wooŋ adi hide-ku agaŋ nadiiŋ. ²Koom Filipai yokwetneŋ nindihiaŋa nihitubu-meka tigiŋ u maŋaŋ agaŋ nadiiŋ. Unduŋ tiniŋgiŋ iŋgoŋ indi fiit gweheye mu tugumun. Mokoŋ. Indi Bepaŋ'walaŋkade unene adi welenik tubukilitibune metam mik tiniŋgiŋ adi'walaŋ namandahik foloŋ fafaŋe tiŋa gigineŋ yali Bepaŋ'walaŋ Mede Momooŋ u hidi hanihautagumun. ³Indi Jesu nadisumineŋ yoŋa hanihehimanegumun, nai uŋaniŋ indi mede yalaŋ mu yogumun, be indi muneŋeŋ bomboŋdok nadiŋa mu halamukumun. Mokoŋ. ⁴Koom Bepaŋdi nibune tuwot tubune Mede Momooŋ u yotubuhautadok kwanai nimguk. Unduŋ doktiŋa indi metamdi kwanainik u kaune utumbawekdok yoŋa mede mu yohautayam. Mokoŋ. Adi Bepaŋdi welenik maaneŋ kanadi tilak, unduŋ doktiŋa indi yadi negoŋ kwanainik u kanadiune utumbawekdok nadiyam. ⁵Hide-ku agaŋ nadinimiŋiŋ, indi yohohoket mede nemu haniŋgumun be gigitmede gineŋ yogaligalike tiŋa muneŋeŋ bomboŋdok siloda nemu tugumun, u Bepaŋdi maŋaŋ nehiulihiune

yolat. ⁶Kilisto'walaŋ aposelŋiye inditok nadinimbune loune utumbawek, u agaŋ nadiyam iŋgoŋ fiit hidibe, be metam noli hiditok me bombonŋi tihamdok mu yogumun. ⁷Mokon, indi adi tam niŋdi wapmihiniye nomyout tiyemiŋa yabudokolak unduŋ hidigut kulemaŋgoŋ hatiŋjila undugoŋ tihamgumun. ⁸Hidi adi indi'walaŋ notniye hinek mintaune indi welenikdi habukahile hinek tugumun, wendoktiŋa indi Bepaŋ'walaŋ Mede Momooŋ u haniŋdok nadigumun. Tiŋa undugoŋ u hogok moŋ, hidi hehitubu-lodadok tiŋa hatihatnik bikabudok maŋ loda tugumun.

Pol adi Tesalonaika kayoŋbop'walaŋ behik nati tuguk

⁹Notniye, indi hidigut hatiŋjila kwanaimiŋ tiŋa Bepaŋ'walaŋ Mede Momooŋ yohautagumun u agaŋ nadiiŋ. Indi nanaje nimteidok tiŋa malabumuŋ hamneemneŋ yoŋa fafaŋe tiŋa hadapmo be timiŋ kwanai fafaŋe tiŋa tugumun. ¹⁰Indi adi titiŋ didimeniŋ tiŋale yomnit mokit, uŋgoniŋ hatiŋa metam Jesu nadisukilitimiŋ hiditok titiŋ dediniŋgoŋ tihamgumun u adi hide-ku agaŋ nadiiŋ, kaŋ Bepaŋdi maŋ undugoŋ agaŋ nadilak. ¹¹Hide-ku molomolom a nadiiŋ, indi baŋ niŋdi wapmihiniyedok tiyemilak titiŋ wendok tuwot hinek hiditok tihamgumun. Unduŋ tihamuŋa nadinadihik molomolom tubukaikaŋ welehiŋ tubukilitigumun. ¹²Tiŋa titiŋ u Bepaŋ ne'walaŋ titiŋiŋiŋ hinek uŋak takalidok hanihautagumun, woŋ adi Bepaŋ negoŋ iitŋiŋ hauta filimpipitnit u kahileeŋ ne'walaŋ hebeŋ gineŋ hatihati gitipmuŋ hatakneŋ uŋoŋ hatidok habukahileguk, doktiŋa unduŋ tiyam.

Tesalonaikahi adi Mede Momooŋ nadiŋa boi hatiŋiŋ doktiŋa folofigita nadigiŋ

¹³Indi Bepaŋ'walaŋ medeŋiŋ hanine nadiune me mede mu tuguk. U Bepaŋ ne'walaŋ medeŋiŋ hinek unduŋ adi kedem hinek nadigiŋ. Adi yadi Mede Momooŋ nadisukiliti tiŋiŋ hidi'walaŋkade kwanai tilak. Wendoktiŋa indi Bepaŋ helemahemaŋ hati niutumbayam. ¹⁴Notniye, hidi adi Bepaŋ'walaŋ kayoŋbop Judiya maaneŋ Jesu Kilisto gut woŋ galigiŋ aditok tuwolit hinek tigiŋ. Adi Judame hekidi widihiŋa folofigita yemgiŋ, undugoŋ hidi maŋ nohiyedi fidihiniŋa folofigita hamgiŋ. ¹⁵Judahi adi Wapum Jesu tiŋa polofet heki widihikumunŋiŋ, eŋ indi maŋ nindihiniŋa nihikele tigiŋ. Adi yadi Bepaŋdi titiŋ tineŋdok nadilak u sigilulum tiŋa metam hogohogok memik tiyemiŋiŋ. ¹⁶Tiŋa undugoŋ metam Judahi'walaŋ feknit mokit Mede Momooŋ u yenine nadiŋa kedeba-utumba tineeneŋ yoŋa kamehep tinimiŋiŋ. Unduŋ tiŋa kadakanŋiŋ helemahemaŋ tubune manŋgoŋ tokiune Bepaŋ'walaŋ welenŋ kudup daune kibikoŋhik tuwolit hinek moŋgotdok yodapmaguk.

Poldi Tesalonaikahi kotigoŋ woŋ yabudok welenŋ yout tuguk

¹⁷Notniye, Judahidi tubune nai muniniŋ-kabe hinek i bihabam, tiŋa baŋdi wapmihiniye kweetniŋ halune nadilak unduŋ nadihamam.

Namandahik adi mu habam, iŋgoŋ welenikdi hidigut hatak. Indi yadi habudok hinek nadiyah, unduŋ doktiŋa kotigoŋ bubuŋdok fafaŋe tiŋa talik lohiam. ¹⁸Indi hidi'walaŋkade bubuŋdok nadiyah, kaŋ Pol nu maan nai fee hinek talik kameka tugut. Iŋgoŋ Sadanŋdi kamehenamtabuguk.

¹⁹Wapumnik Jesu baakneŋ indi maŋgandi nihitubu-lodaune nadifo tiŋa fafaŋeeŋ namanda gineŋ yatneem? Be indi maŋgoŋ mongola wooŋ kwanainik momooŋ tam iŋak nine kawaak? Indi adi hiditok-ku tiŋa nadifo tineem oŋ. ²⁰Biyagoŋ hinek, hidigoŋ wotniniyegigit yotiloŋiŋ tiŋa undugoŋ welenadifonik.

Poldi Tesalonaikahidok nadibedi tiŋa Timoti niŋkulune uguk

3 ¹Indi hiditok tiŋa nadinadi uŋgoŋ hati tugumun, tiŋale nai kweheyeŋiŋgoŋ hatidok u nadinene tuwot mu tuguk. Unduŋ doktiŋa indi Atens uŋoŋ haliaŋa ²Timoti kamenene hidi'walaŋkade uuŋdok mede yofolok tugumun. Adi yadi indi'walaŋ notnik eŋ Bepaŋ'walaŋ kwanaima hatiŋila Kilisto'walaŋ Mede Momooŋ yolakdi hidi'walaŋkade wooŋ hehitubu-kilitiŋa nadisukilitihik tubulodadok niŋgumun. ³Tiyaugene hidi malabumuŋ eŋ folofigita gineŋ hatiŋa gweheyeeneŋ yoŋa unduŋ tihamgumun. Hidi hide-ku agaŋ nadiiŋ, Mede Momooŋ adi kulemaŋgoŋ hatiŋa nadidok mu niniŋgiŋ. ⁴Indi koom hidigut hatiŋila mede indiŋ haniŋgumun, "Malabumuŋ mebimebi indi foloŋ lowaak." Kaŋ mede wendi biyagoŋ undugoŋ mintaguk u agaŋ nadiiŋ. ⁵Kaŋ tikamanda medi hanihohoket tubune gweheyeune kwanainikdi filaakneŋ, doktiŋa hatibene nai-kabe mu kweheyelune Timoti kamewe nadisukilitihik kanadi tibek yoŋa uguk.

⁶Ala Timoti adi bihabuŋa udaneŋ buŋa nadisukilitihik eŋ me noli yabukahilekahile diniŋ gigithik momooŋ u niniŋguk. Hidi inditok nadiŋa welemomooŋ nadinimiŋ. Tiŋa indi hidi habudok yoyane toboniŋ hidi maan undugoŋ indi nibudok yoŋiŋ, mede u maan agaŋ ninindapmaguk. ⁷Notniye, indi malabumuŋ mebimebi maaneŋ hatiyanene hidi nadisukiliti gineŋ fafaŋe tiŋa yaŋiŋ unduŋ u nadinene welenik tubukilitilak.

Poldi Tesalonaikahi fafaŋeŋ yomnit mokit hatidok yeneŋguk

⁸Hidi fafaŋe tiŋa Wapum'walaŋkade hatiŋiŋ, indi u nadiŋa welenik kulemaune welemomooŋ nadihamam. ⁹Indi hiditok nadiŋa Bepaŋnik namanda foloŋ nadifo loloŋnit hinek tiyam. Tiŋa indiŋ nadiyah, indi Bepaŋ niutumba tiyam wendi Bepaŋ'walaŋ nadifo indi'walaŋkade bulak wendok tuwolit mokoŋ. ¹⁰Bepaŋdi nai nenobuniŋ nadinimbune hidi'walaŋkade wooŋ kikakika tiŋa kwanainik tomboyoula tiŋale nadisukilitihik tubukwambundaneem yoŋa helebufa indigoŋ tuwot ninadi kwanai tiyam. ¹¹Betnik Bepaŋ eŋ Wapumnik Jesu adi kedem

talik neej tubumintanimbune hidi'walaŋkade uneem. ¹²Hidi'walaŋkade adi Wapumdi me noli yabukahilekahile titiŋhik u tububedihambune hidi hide uŋgoŋ be metam noli gut welesiloŋ taneej. Indi maan hiditok undugoŋ tihamam. ¹³Titij unduŋ tubune Bepaŋdi welehhik kedem tubufafaŋehambaak, ala Wapumnik Jesu adi metamŋiye uŋgoniŋ hogohogok adigut kotigoŋ baakneŋ nai uŋaniŋ habune uŋgoniŋ tineej. Hidi adi Betnik Bepaŋ namanda foloŋ yomhinit mokit eŋ didimehi yatneej. U biyagoŋ.

Bepaŋ'walaŋ namanda gineŋ didimeniŋ hatidok

4 ¹Notniye, Wapum Jesu doktiŋa hanihehitubu-kiliti tiŋila noli indiŋ hanine nadiŋeŋ: Mede Momoŋ foloŋ hatihati eŋ titiŋhik u Bepaŋdi kaŋ nadiune utumbadok hanihehitubu-didimegumun gineŋ uŋgoŋ hatiyaneej. Mede Momoŋ foloŋ hatihati u kedem hatiŋ, ala titiŋ u gicine tiŋa keleeŋ hatidok wendok haniyam. ²Wapum Jesu wou foloŋ mede hogohogok hanindidimegumun u hide-ku agaŋ nadiŋ. ³Bepaŋ'walaŋ nadinadiŋiŋ adi indiŋ: Hidi hatihatihik hogohogok u adi'walaŋkade kameune uune uŋgoniŋ hatidok. Unduŋ tiŋa keffile talik mebimebi haliwiŋ u kedem yalakapmeneej. ⁴Hidi adi welehhik gineŋ molomolom nadigalika tiŋa nadinadi hogohi pilatak uyadi momoŋgoŋ hinek yabudakaleej sigilulum tiyemaneej. Unduŋ tiŋa Bepaŋdi titiŋ deŋak titiŋdok nadilak, titiŋ walaniŋ eŋ kedem uŋak taneej.

⁵Tiyeugene nadigalika be nadinadi hogohi wendi hehimaneune hatifile mebimebi tiyauneeneŋ ala. Unduŋ adi metam kaulehi Bepaŋ mu nadimiŋ hekidi tiŋ. ⁶Nebek niŋdi kamehep u lahula me nohiye yalamula tamhiye dut titiŋ undihi u mu tiyaneej. Indi wendegoŋ mede fafaŋeŋ koom indiŋ haniŋgumun, "Wapumdi me hogohogok nediyendi titiŋ undihi tineej aditok adi kibikoŋ malabumuŋ wobuyembaak." ⁷Bepaŋ adi titiŋ hogohi geŋgeŋhinit u yehikelenim mu yoŋa ninigikuk. Mokoŋ hinek. Adi yadi hatihatiniŋ u ne'walaŋkade kamedapmaŋ titiŋ uŋgoniŋ u takalidok yoŋa ninigikuk. ⁸Unduŋ doktiŋa me nediyendi mede u lahutak, adi yadi me'walaŋ mede hogok mu lahutak. Mokoŋ. Adi yadi Bepaŋ Uŋgoniŋ Munabuliŋiŋ hamulak, adi'walaŋ medeŋiŋ maŋ lahutak.

Hidi welekubugoŋ hatiŋa titiŋ momoŋ fafaŋe tiŋa tiyaneej

⁹Metam hekinolit hatiŋa welesiloŋ titiŋdok woŋ adi agaŋ Bepaŋ ne hanihehitubu-didimeguk. Unduŋ doktiŋa indi mede wendok kotigoŋ mu youhamnim. ¹⁰Tiŋa notniye, hidi metam kayoŋbop tigiŋ hogohogok Masedoniya kwetneŋ hatiŋ u welesiloŋ tiyemdapmaiŋ, ala indi titiŋhik u tomboyoula undugoŋ titaudok wendok haniŋkilitiyam.

¹¹Indi koom mede indiŋ niŋ haniŋgumun: "Hidi kulemaŋgoŋ hatiŋila hide'walaŋ kohohikdi kwanai tiŋa iithik kaulidokoyaneej." ¹²Unduŋ tiŋa

hidi nemek niŋdok baniŋ nemu tineeŋ, kaŋ metam kayoŋbop mu tigiŋ gineŋ hatiŋ hekidi titiŋhik u kaŋ nadifoune momooŋ tibaak.

Jesu busuwaune nemek mintawaak diniŋ mede

¹³Notniye, hidi tiyaugene metam kumuŋ tigiŋ hekidok nadigiyondaan me hatihati fafaŋeniŋ diniŋ pilapilat wondok nadikunakunale mu tiŋ hekidi tiŋ unduŋ tiŋa kobulabulayeŋ bulanŋgoŋ kisaŋ hinek tineeneŋ doktiŋa haninene nadineŋ. ¹⁴Indi Jesudi kumuŋa kotigoŋ kaikaan pilakuk u agaŋ nadisukilitiyam. Unduŋ doktiŋa indi agaŋ nadiyam. Jesu'walaŋ saŋiniŋniŋ gineŋ Bepaŋdi metam kayoŋbop agaŋ kumuŋgiŋ u yehitubu-kaikaune pilali Jesu dut kotigoŋ buneŋ.

¹⁵Indi Wapum'walaŋ mede indiŋ hanihautayam. Wapumdi kotigoŋ baak nai uŋaniŋ metam hatihatihinit kaipmuŋ hatineem indi me kumuhi talitimeŋ mu tiyemiŋa uneem. Mokoŋ. ¹⁶Bepaŋdi mede saŋiniŋnit yobune aŋelo heki'walaŋ talitimeŋhikdi kuti tubune Bepaŋ'walaŋ baidi mede tobaak. Kaŋ Wapum adi kunum bikabuŋa fowaak, kaŋ metam Jesu Kilisto nadisukilitimiŋa kumuŋgiŋ heki adi yadi timentimeŋ pilatneeŋ. ¹⁷Nai uŋaniŋ metam hatihatihinit kaipmuŋ hatiyam, indi pilap hinek ninigilune metam adigut mulukwaŋ gineŋ noŋgoŋ loneem, looŋ Wapum gut kimindep tineem. Unduŋ tiŋa adigut hatineem dapmandapmaŋnit mokit. ¹⁸Ale hidi maŋ Bepaŋ'walaŋ metam yehitubu-kilitiŋa mede i yenhautane nadineŋ.

Jesu kotigoŋ baak diniŋ mede

5 ¹Notniye, indi nemek u melenai be maŋgoŋ nai foloŋ hinek mintaneŋ wendok adi nemu youla haninim. ²Hide-ku agaŋ nadiiŋ. Wapum'walaŋ nai adi kubomedi timiŋ biŋ wondok tuwolit tobogoŋ busuwawaak. ³Kaŋ metam adi indiŋ yoneŋ, “Nai yoŋ adi nai momooŋ hinek. Doktiŋa kedem hatiyam.” Kaŋ nai uŋaniŋ nemek yehitubu-kadakadok wendi adi tamwoi mihiwelehinitdi wapmihi yahaŋedok folofigita nadiiŋ wondok tuwolit pilap hinek mintayembaak. Kaŋ nemek wendi adi tuwot mu yehikalakapmewaak.

⁴Iŋgoŋ notniye, hidi mambip gineŋ be hatiŋ doktiŋa Wapum'walaŋ bubuŋiŋ naidi kubome nabugoŋ busuwahambune boho tineeŋ? U mokoŋ. ⁵Hidi hogohogok adi hauta tiŋa mele diniŋ me. Indi adi timiŋ gut mambip diniŋ mebop moŋ. ⁶Unduŋ doktiŋa tiyaugene me noli damo deihatneemneŋ ala. Adi toboniŋ daunik diwehautaŋ nadinadinikdi maŋ nadidakale tiyaneem.

Wapum baak nai mu nadiiŋ doktiŋa wendok fook tiyaneŋ

⁷Indi a nadiyam, me damo dahatiŋ heki adi yadi timiŋ damo deikiŋ. Eŋ me ime fafaŋeniŋ naŋ nadibubuye tiŋ heki adi yadi timiŋ ime

fafaŋeniŋ naaŋ nadibubuye tiinŋ. ⁸ Inŋoŋ me hadapmo diniŋ mebop indi adi nadidakalehinaka titinŋdok. Indi adi Bepaŋ nadisukilitimindok titinŋ eŋ metam noli yabukahilekahiledok titinŋ uŋak moŋgokaneem. Titinŋ wendi mik diniŋ dahidahi fafaŋeŋ wondok tuwolit tubune dahiyaneem. Tiŋa Bepaŋdi kotigoŋ ninigitdok woom hatihati, wendi mik kulunŋ fafaŋeniŋ wondok tuwolit tubune mokoyaneem. Unduŋ tiŋa fafaŋeŋ yali fook titinŋdok. ⁹ Bepaŋ adi kwihitaŋinŋdi indi foloŋ loloŋdok yoŋa mu nibukahileguk. Mokoŋ. Adi toboniŋ Wapumnik Jesu Kilistodi kotigoŋ ninigitdok yoŋa nibukahileguk. ¹⁰ Jesu adi indi nihitubu-lodadok yoŋa kumuŋguk. Unduŋ doktiŋa indi kaipmuŋ hatineem be kumuneem, inŋoŋ adigut hatihatihinit kaipmuŋ hatineem. ¹¹ Unduŋ doktiŋa hidi kubugoŋkubugoŋ hinekdi kobuk hide tiinŋ unduŋ tiŋale kitubuloda tiŋa kiulihitianeŋ.

Poldi mede yeniŋkilitidapmaaŋ yeniŋkahaŋ tuguk

¹² Notniye, indi indinŋ haniyam. Hidi me hehitubu-loda tiinŋ heki u gikiŋgoŋ tiyemiŋa hebehik gineŋ hatiyaneŋ. Adi Wapumdi talitimeŋhiye yapmeguk, kaŋ adi titinŋhik tubudidimedok mede haniinŋ. ¹³ Hidi, adi kwanai u tiinŋ wendok nadisuŋa welemomoŋ nadiyemiŋa yabukahile hinek taneŋ. Unduŋ tiŋa welekubugoŋ tiŋa hatiyaneŋ.

¹⁴ Notniye, indi mede niŋ indinŋ haniŋgigineyam. Hidi me hogok hatifit tiŋa hatiliweliweŋ tiinŋ heki'walaŋ hatihatihik u yehitubu-didimeneŋ eŋ me simintahi nadibedi be meka namandap hatiinŋ u yehitubu-kilitineŋ tiŋa me gweheyehi u yehitubu-lodaneŋ. Unduŋ tiŋa metam hogohogok wanakaŋ kulemaŋ kulemaŋ tiyemaneŋ.

¹⁵ Adi titinŋ kadakaninŋ nobu tihambune kaŋ hidibo kibibo kadakaninŋ tiyemneeneŋ ala kikadoko tiyaneŋ. Hidi adi helemahelamaŋ Bepaŋ'walaŋ metamniye be metam noli hogohogok wanakaŋ titinŋ kedem hogok tiyemaneŋ.

¹⁶ Hidi helemahelamaŋ nadifo taneŋ, ¹⁷ tiŋa helemahelamaŋ ninadi kwanai taneŋ. ¹⁸ Nemek niŋ mintahamuluwaak inŋoŋ fiit Bepaŋ welemomoŋ nadimiŋa niutumba taneŋ. Bepaŋ adi metam nediyeŋ Kilisto Jesu gut wooŋ galiinŋ hidi adi titinŋ undihigoŋ titinŋdok nadihamulak.

¹⁹ Uŋgoŋinŋ Munabulidi nemek niŋ titinŋdok haniŋgigine tubune kaŋ nai uŋaniŋ hidi kamehep mu timiyaneŋ, ²⁰ tiŋa undugoŋ, me niŋdi polofet mede hanimbene tubune kaŋ nadikadaka mu taneŋ. ²¹ Hidi yadi tobo mede eŋ titinŋ hogohogok uŋak baigoŋ yabukolodi taneŋ. Unduŋ tiŋa titinŋ kedehi u hogok yabukahileŋ ²² titinŋ hogohi hogohogok u biyabu taneŋ.

²³ Bepaŋ welekulema molom, adi negoŋ kedem hehitubu-lodaune hatihatihik aditok hogok mindapmaneŋ. Unduŋ tiŋa hehitubu-lodaune

uŋgoniŋ hogohogok mintadapmaneŋ. Tiŋa adi negoŋ munabulihik eŋ welehik eŋ foloohik wanaŋ kaulidokohamulune Wapumnik Jesu Kilisto kotigoŋ baak nai uŋaniŋ hidi yomhinit mokit momooŋ hogok yatneeŋ.

²⁴Bepaŋ kutihaniŋ tuguk adi yadi mede yoguk wendok tuwot hinek takaliŋa tilak. Adigoŋ nemek hogohogok u tihambaak.

²⁵Notniye, hidi Bepaŋ ninadiune adi kedem nihitubu-lodawaak.

²⁶Bepaŋ'walaŋ metam indi titiŋ tiyam u keleeŋ hide kubugoŋ kubugoŋdi metam noli gut kohokukut tiŋa mede momooŋ kiyonadi tiyaneŋ.^a ²⁷Nu Wapum namanda foloŋ haniŋfafaŋe tilat. Hidi pepa i Bepaŋ'walaŋ metam hogohogok wanaŋ kunayembune nadineeŋ.

²⁸Wapumnik Jesu Kilisto'walaŋ siloŋ tobogoŋdi hidigut haliwooŋ halaak.

^a 5:26 “Bepaŋ Betnik momooŋ nibudokolak” be “Bepaŋdi gehikahaŋnewek” be “Bepaŋ hidigut hatibek”, mede undihidok nadiŋa youkuk.